

ՔԱՋ ԿԻՎԻՎԸ

Ճախիններում, գետին մոտիկ,
 Գեղափետուր ու խատուտիկ,
 Բարձրասըրունք, ցըցունազարդ
 Ո՞վ է ճեմում սեգ ու հպարտ,—
 5 Կի՛վի՛վ, կի՛վի՛վ...

Գեղափետուր ու խատուտիկ
 Քաջ կիվիվն է գետին մոտիկ,
 Իր զինվորներն արթուն շորս դին —
 Ուրուրն ու բուն, բազեն ու ցին:

10 Ուրուրն ու բուն, բազեն ու ցին
 Լազլագի դեմ արշավեցին:
 Թևին արավ Լազլագն ահից.
 «Աման, ասավ, մի՛ դիպչեք ինձ,
 Ինձ ու մանրիկ իմ ձագերին.
 15 Ճահճի միջին, առվի եզրին
 Մի հատ ոտիս կանգնած էսպես՝
 Քաջ կիվիվի ջըրվորն եմ ես»:

Ուրուրն ու բուն, բազեն ու ցին
 Ագոավի դեմ արշավեցին:
 20 Թևին արավ Ագոավն ահից.
 «Աման, ասավ, մի՛ դիպչեք ինձ,
 Ինձ ու մանրիկ իմ ձագերին.
 Մառի ծերին, սարին, քարին —

Սևեր հագած ծընած օրես
25 Քաջ Կիվիվի երեցն եմ ես»:
Ուրուրն ու բուն, բազեն ու ցին
Սագի վըրա արշավեցին:
Թևին արավ Սագը ահից,
«Աման, ասավ, մի՛ դիպչեք ինձ,
30 Ինձ ու մանրիկ իմ ձագերին,
Տիզմի միջին ու մարգերին
Օրոր-շորոր, խոնարհ ու հեզ,
Քաջ Կիվիվի տընտեսն եմ ես»:

Ուրուրն ու բուն, բազեն ու ցին
35 Կըռունկի դեմ արշավեցին,
Թևին արավ Կըռունկն ահից,
«Աման, ասավ, մի՛ դիպչեք ինձ,
Ինձ ու մանրիկ իմ ձագերին,
Ամեն աշխարհ, որ աշխարհին
40 Գարունը գա՝ բանա հանդես –
Քաջ Կիվիվի աշուղն եմ ես»: